

Vegglistaverk.

Til Heimastjórnar Djúpavogs

Brot úr fundargerð:

27. fundur

23. júní 2022 kl. 10:00 - 14:30á

skrifstofu sveitarfélagsins, Djúpavogi.

Lagt er til að nýta fjármagnið til að fá vegglistaverk á vegginn við bryggjuna, ráðinn yrði listamaður, helst með tengingu við Djúpavog, ef kostur er, sem vinnur hugmynd út frá Djúpavogi. Verkið gæti verið tilbúið fyrir Cittaslow sunnudag sem er síðasta sunnudag í september ár hvert.

Heimastjórn list vel á hugmyndina og felur verkefnastjóra menningarmála að vinna verkefnið áfram.

Þessi veggur hefur oft verið í umræðunni enda mjög áberandi. Margar hugmyndir hafa komið fram og verið ræddar og þar á meðal; að fá listamann til að gera eitthvað með vegginn. Sú hugmynd hefur oftast verið sú fyrsta sem slegin hefur verið út af borðinu samkvæmt mínu minni. Það hafa verið margir fundir og umræða um þennan vegg og umhverfi hans og þvottaplanið.

Málverk á þessum stað yrði mjög áberandi. Þetta verður væntanlega listaverk sem er þá höfundarréttarvarið og gæti næsta sveitarstjórn t.d. ekki látið mála yfir. Þetta er ekki það sama og að fá málara til að mála vegg og ef að liturinn sem valinn var er ekki nógu góður, passar ekki eða íbúar ekki sáttir við, þá er bara hægt að mála yfir.

Hvar er eða var umræðan um þetta og getur heimastjórn bara tekið ákvörðun um svona án umræðu? Það er allavega ekki hægt að lesa í fundargerð að þetta hafi verið rætt á faglegum nótum.

Er íbúum ætlað að tjá skoðun sína þegar verkið verður málað eða lokið er við að mála það?

Ég hélt að svona ákvörðun þyrfti að ræða í umhverfis- og framkvæmdaráði og fara í eðlilega grenndarkynningu þar sem hugmyndin að mála vegginn væri tekin fyrir og svo skissa eða tillaga að endanlegu verki væri kynnt.

Ef að ég væri að leita að vegg til að mála þá væntanlegt listaverk eða skreytingu þá væri þetta ekki veggurinn. Það er t.d. þarna spennistöð hinumegin við götuna við veginn að tjaldstæðinu, sem mætti mála og þá allan hringinn. Þetta gæti verið snoturt og lífgað uppá miðbæinn. Auðvita þarf eigandi (RARIK) að veita leyfi. Hægt væri að ganga enn lengra og mála allar spennistöðvarnar í þéttbýlinu.

En stóra vegginn, með Geysi, Löngubúð og Faktorshúsið í nágrenninu er bara ekki boðlegt að fara svona með án umræðu og kynningar meðal heimamanna.

Umræðan um vegginn dofnaði eftir því sem hann varð mosavaxnari og féll betur inn í umhverfið. En með þessari fyrirhuguðu framkvæmd stefnir að ég held í langt tímabil nýrra umræðu og væntanlega þrætu um „vegginn“

Djúpavogi 31. ágúst 2022.

Þór Vigfússon.

Hrauni 1, (Sólhól) Djúpavogi.